

Team CINEARUBA a logra 5 premio na Bonaire

KRALENDIJK - Entrega di premio di e competencia di 48 ora di Bonaire a tuma luga riba diasabra cu a pasa y e team di CINEARUBA a logra konkista 5 premio. Segun un comunicado di CINEARUBA, tur cos a cuminsa ora cu Juan Francisco Pardo di Fundacion CINEARUBA a acerca e hoben Ronney Dotel pa forma parti di team CINEARUBA pa participa na e competencia di 48 ora di Bonaire.

E comunicado ta splica cu durante e simannan cu a sigui e team a crece y a keda completa cu nuebe miembro, kendenan ta Ronney Dotel, Ephrayim Odor, Adriano Nanof, Juan David Villar, Juan Ivan Quandt, Kenna Hernandez, Gustavo Pulido, Darwin Sanchez y Juan Francisco Pardo.

Riba diabierna 2 di november e team di CINEARUBA a ricibi nan genero di pelicula y tur e atributonan cu mester sali den e pelicula. Ephrayim Odor a crea e storia y el a skirbi e script cu a haya e titulo di Time Frame. Riba diasabra e team a haci tur e grabacionnan y e mes un diasabra

nan a inicia cu e post-produccion di e pelicula cortico. Diadomingo e team a finalisa e edicion tanto di zonido como edicion di imagen. Despues nan a entrega e pelicula na un representante di Departamento di Cultura.

Riba e anochi di gala, CINEARUBA a keda representa na Bonaire pa Judith Brekelmans kende a ricibi e premionan den number di e team di CINEARUBA. E premionan ta consisti di: Miho uzo di personahe, miho disenyo di zonido haci pa Adriano Nanof, miho actor den man di Ephrayim Odor, miho direccion bao di encargo di Ronney Dotel y miho cinematografia bao di encargo di Ronney Dotel y Juan David Villar. Tambe Time Frame a keda na di dos luga pa miho pelicula cortico.

“Fundacion CINEARUBA ta gradici Elvis Lopez y Ateliers '89 y tambe na e organisadonan di ‘48 ora Bonaire’, entre otro señor Dennis Martinus pa e oportunidad pa participa. Fundacion CINEARUBA ta felicita su team y tur e otro participantenan cu a keda premia.”

